

广东通志

广东通志

廣東通志卷三百八

甲子重刊

列傳四十一

列女三

廣州府三

順德縣

明

劉存心妻何氏景泰元年黃蕭養作亂大兵勦鄉
存心外出何同翁松溪家居翁因足疾不能逃何
侍翁不忍獨活兵至翁婦俱遇害

府志

崔壽保妻胡氏年二十三夫死黃蕭養作亂鄉人

立鎮拒賊爭負財物胡獨抱家廟神主而已

同上

梁明妻潘氏黃蕭養伏誅元戎並殺脅從者明與

妻隱草野間軍逼其妻明捍之爲所殺擄潘去潘
曰吾腰領中有寶飾解以相贈從未晚也卽投江
而死年二十四男女各一人其婢負以逃亦爲軍

所擄

黃志

李道妻何氏年二十一生一子標不兩月而道歿
何守節不二道母溫氏年老頻病何躬侍藥晝夜
不離寢所每焚香祝天祈代姑歿罄簪珥營葬宏

治五年旌

同上

吳翹妻李氏生子鎮都方乳哺而翹歿李年二十
三矢志自守事舅姑甚謹姑老久病李偕子奉侍
湯藥不離側巡院督學遣官周卹以貞節表其間

金志

何福餘妻周氏年二十七生一子居二年福餘死守節不二何積五喪周竭力葬之孀居四十年人無間言年六十八有司奏聞旌表

黃志

族孫應黼妻

譚氏亦以守節旌

廣州貞烈傳

指揮僉事程富妻鍾氏成化間適富未期而富卒鍾年十七葬夫服闋舅姑憐其無子欲令改嫁鍾慟哭誓死孀居四十餘年有司題旌

府志

蕭孔妻左氏姑梁臥病一十九載左頃刻不離親除糞穢姑歿痛苦人不忍聞巡按姚虞學使林雲

同表其廬曰孝行堂

郝志

文學梁次掄妻倫氏寡時年二十二節矢堅貞動

必循禮鄉黨稱之詔旌其門

同上

奈昌儒妻陳氏年二十四昌儒卒陳堅心守節有

司奏請旌表白沙陳文恭公題其坊柱曰飛龍舞

鳳文明世白日青天節義門

廣州貞烈傳

生員羅昌儒妻蘇氏昌儒爲名諸生早卒蘇年二

十四矢志不二竭力奉姑一女適陳得子甫晬而

陳卒蘇聞訃慨然曰夫死守節婦之常也復何言

女亦矢操以終直使郭文周學使張希舉屢表其

門

梁直清妻周氏文康公儲祖母也年二十四喪夫

矢志不二撫孤子祖順茹荼飲冰苦節彌厲及諸
孫林立周撫之喜曰諸孫俱貴其第四尤不凡必
大梁門吾夫不亡矣第四卽文康公儲也以孫貴
贈淑人

周繳妻陳氏年二十四而繳歿無子育夫兄之子
爲嗣孀居四十餘年撫按以下屢以貞節顏其堂

俱同上

生員嚴濟裕妻盧氏年二十五寡撫幼子事老姑

紡績自給六十餘年有司表其堂

府志

蔡善芳妻盧氏年二十三夫故矢不再適鄉間稱
之卒年六十餘同邑馮瑜妻年二十七而寡守志

不二縣令並旌其門

縣志

蘇淑英璿儀女受梁錫璆聘錫璆亡聞訃慟哭奔喪爲父母所阻錫璆從母淑英族姑也淑英乘間隨姑密往梁家謁翁姑後拜錫瑜靈朝夕哭泣事翁姑如父母有司上聞旌表

縣志

關元妻歐氏歸二載元卒子承憲方半歲歐孝養舅姑躬執麻枲以備棺殮撫訓孤子克成立孀居八十二卒知縣王寢大表之

何祖雄妻李氏年二十八夫死子功右始生三月李撫孤守志久而不渝瀕卒遺金數十兩適歲饑囑功右備賑貧民事聞巡按郭文周督學張希舉

匾其堂曰節義徽音

譚氏女幼受祭子將聘年十八夫故歸祭先吉服
謁舅姑次就喪痛哭從容有禮始終一節竟以哀
毀終年三十五

生員陳謀妻梁氏事舅姑孝敬盡禮內外無間言
潘陳二侍御先後給孝行匾旌其間俱同上

李朝雲妻朱氏名宏義幼讀書通女誠明大義年
十九夫歿朱哀毀骨立矢志靡他粵中見聞夫之姊孀

居依其家朱事之如姑無甥如子郝志郡邑人士交

舉其節朱止之曰吾分也奚旌爲聞者義之粵中見聞

嘉靖癸巳建坊府志

蕭復昇妻黎氏年十八于歸一載夫以事赴京卒
于途黎守志不渝年六十終先儒鄧伯凱詩悼之
曰萬事銷鎔花上露一心清白竹間霜門閭勿謂
無旌表贏得潯流姓字香

廣州貞烈傳

梁素琴繼妻張氏歸歲餘舉一子而素琴歿張年
二十二冰霜凜操姑黃年逾八旬承事以孝藐孤
三人其二前室陳暨側室馮出也馮亦貞淑相與
砥節撫孤同盡母道學使錢朝鼎書貞德一門額
旌之同時郡庠梁尙赤祖母盧氏亦以節孝聞郡
守王庭旌其廬

何思存妻方氏大學士獻夫女年二十三夫歿無

子矢志不二擇繼承祧恭謹貞恪年逾七十巡按
陳聯芳梅渚督學勞堪劉應騏先後題請旌表

彭于震妻梁氏年二十歸彭三載生子應文再期
于震卒梁事姑敬順撫孤有成嘉靖丁巳署縣令
夏棫以禮存問聞于憲司顏其堂曰貞節時梁六
十一齡云俱同上

蘇元貞妻何氏年二十三夫卒遺腹四月產子紹
先何矢志守節紡績以供舅姑年六十七有司旌
之府志

何瑋妻周氏二十二歲孀居教子紡績自給會歲
饑翁姑憐之命改適周指天自誓不肯奪志年踰

八十縣令區以慈節御史委官存問焉

陳志亮母李氏年二十一夫死志亮妻羅氏年二

十三而亮死姑婦相依守節至老

俱同上

生員譚秀妻張氏年十八秀卒遺腹子廷沛矢志

孀守勤儉教子年七十六卒

廣州貞烈傳

區理卿妻勞氏年二十歸三載夫死勞矢不他適

家貧日勤紡績以養老姑十五年而姑卒復憐伯

妣蚤喪撫育其子女六人爲之婚嫁行年七十始

終如一宗黨稱勞氏所處有四難焉蚤孀一也無

子二也糟糠不厭三也養姑撫姪四也

同上

梁宗可妻盧氏于歸二年而夫卒遺腹一子舅屢

奪厥志矢死終身知府王庭表其廬

府志

陳俊文妻羅氏年十八適陳甫五月而夫患癰羅侍湯藥竭心力罔懈比疾篤籲天請以身代夫亡未越旬痛悼繼卒聞者傷之

黃富春妻梁氏早寡無子矢志擇繼訓之成立萬

厯間孀居六十八年卒年九十三

俱同上

贈文林郎薛茂槐妻劉氏茂槐性磊落工詩壯歲觀光太學行至臨清病卒遺孤天植甫四齡劉年二十四聞訃斷髮矢貞事姑郭以孝聞賑饑恤孤德讓化於鄰里爲人嚴正坐立無欹倚其天性然

也直指王命璿題旌

廣州貞烈傳

羅良經妻舒氏年二十七夫故奉事舅姑惟謹喪

葬悉以身任撫遺孤沒齒無間言崇正間旌

郝志

蘇德賢妻何氏年十九而寡矢志柏舟撫孤孀守

至八十子又先何卒撫兩孫教其成立年至百歲

鄉黨咸稱節孝

府志

關仰珏妻區氏歸關二載生子鳳翔三月珏亡區

年二十守節適翁歿過泣日遂瞽一夕夢神告以

孝行聞於上帝許啟其瞽不數日果開年八十二

當事題旌

葉孟儀妻李氏廿齡歸葉未幾孟儀故撫孤孀守

孝敬翁姑年八十五卒又李之曾孫伯玉娶羅氏

年十九歸葉甫六月而寡爲夫定繼嗣服闋還父
家守節坐臥一室履不踰戶閤二十餘年而卒時
稱雙節

李宗球妻馮氏年二十歸李兩載未嗣而宗球卒
奉兩代姑嫜備極孝敬及歿竭力殯葬拮据紡績
度日苦節三十餘年

陳與赤妻梁氏年十八歸陳生長子文聰而與赤
故遺腹生次子文璘梁撫二子依父純吾孀守年

七十七卒

俱同上

梁祖鼇妻蘇氏歸半載夫亡遺腹一子念雙白在
堂遺孤無倚矢志孀守年七十八巡按葛徵奇具

題旌表孫佑達登賢書有聲於時

廣州貞烈傳

鄭氏女受梁子驥聘未婚子驥歿女聞訃亟易縞
衣欲之梁阻於父命痛悼成疾尋取聘物捧膺而
絕子驥從弟子騶聘蘇氏女子騶久病權娶歸侍
湯藥及子騶死淚血交迸亦相繼歿刺史梁繼善

表其間曰雙白

郝志

梁麟之妻羅氏麟弟鵬之妻韓氏羅年二十二韓
年二十皆于歸未久梁兄弟客海南遇賊同日溺
死訃至羅矢志守節韓痛夫沉水亦自死焉遺孤
應佑甫五月羅育之如所生長爲授室孝敬翁姑
身勤紡績茹苦數十年享年八袞有司旌之曰一

門節烈

廣州貞烈傳

羅昌期妻李氏昌期少貧與其弟業刈薪李歸僅歲昌期以弟墮水死往救亦溺焉李聞走哭俄頃兩尸浮出李解簪珥營殯葬時李有遺腹後舉子命之曰存其母微諷以他適李泣曰吾夫死於弟而婦不能死於夫者存羅嗣耳且姑在去之不孝夫死背之不婦子生捨之不慈願母知女心吾志決矣養姑撫幼孀居三十五年又諸生羅醇仲妻蘇氏年十九適醇仲閱四年而寡亦以遺腹生子矢志日堅父母不能奪縣大夫聞其賢與李氏同

時旌之

羅司勳文集